

Jahresbericht 2005

s'Gwerb läbt, stützt und bewegt.....

Chundenöchi, persönliche Kontakt, individuelle Beratig, Flexibilität, Fründlichkeit, guet usbildeti und motivierti Lüüt und no vieles meh, sind ganz sicher d'Vorteil vo eus Gwerbler. I dä wiiterhin schwierige Wirtschaftslag brucht's aber da und det vielleicht no chli meh, oder sogar ganz öppis anders! Mit immer wieder neue Uflage, Bestimmige, Vorschrifte und Gsetz wird's für alli nöd wüekli eifacher. Mer muess vielleicht Ungwöndlichs wage, Innovation zeige, Chundschaft mit Phantasie und Super-Qualität begeischtere um so sini Treui chönne z'gwünne.

Aläss, wie Dorffäscht und Gwerbe-Usstellige sind ä wiiteri Möglichkeit, zum d'Chundenöchi optimal z'pfläge. S'Rägifäscht mit sinere Gwerbeusstellig und s'Dorffäscht Otelfinge sind Vergangeheit, und mer hätt vo dä Ussteller, wie au vo dä Bsuecher nume positivs g'hört. Geschter isch dä Startschuss zu dä RÜGA gfallte und wer scho es bitzeli hätt chönne ineluege und gseh hätt, mit wievill Fliess und Freud d'Usteller bi dä Sach sind, dä isch überzügt, dass au die Usstellig en volle Erfolg wird.

Dä BGV Dielsdorf angaschiert sich wiiterhin aktiv, zäme mit em BGV Bülach mit em Konzept „solidair“ i dä Flughafefrag. Dä Flughafen Klote isch nach wie vor wichtig für s'umliegende Gwerb und hört nöd a dä Bezirksgränze uf!

Wiiterhin setzt sich d'Lehrstelle-Kommission mit unermüedlichen Isatz und viell Herzbluet für d'Förderig vo dä Lehrstelle im Bezirk i und hätt au scho einiges ndernoh und erreicht. Mer kämpfet immer no defür, dass dä BIZ-Standort Dielsdorf bibhalte wird.

Mis Amt als Bezirks-Gwerbverband's Präsidänt jährt sich hüt zum erschte Mal. Ich han es sehr lehrichs und intressants Jahr hinder mir. Mit viel Elan und völlig motiviert han ich das Amt aträtte und mir ziemlich hochi Ziel gschteckt. Teilwies han ich das erreicht, han aber vor allem a verschiedene Sitzige beträffend Standortförderig „Zürcher Underland“ au müesse lehre, dass es bi dä Zämearbeit mit Behörde nöd immer mit em „Bräch-Stange-Prinzip“ funktioniert! Das isch für mich, als eher ungeduldigi Person nöd grad eifach gsi. Das mer aber mit Ziit und Beharrlichkeit ame Ziel au nöcher chan cho, isch ä gueti Erfahrig gsih! Es isch halt scho so: mer lernt immer wieder dezue!

Abschlüssend dörf ich aber säge, dass dä BGV Dielsdorf sin Platz im Bezirk als vertrauenswürdig Organisation wieterhin hätt chöne usbaue und en ernscht gnone Partner für Behörde und Institutione worde isch und sich so optimal uf allne Ebne fürs Gwerb isetze cha.

Im vergangene Jahr sind Gschäft vom BGV a 4 Usschuss-Sitzige und vier Vorstands-Sitzige behandelt worde. Wieter han ich a 10 KGV-Sitzige teilgnoh und im Name vom BGV 4 Sitzige betreffend Standortförderig Zürcher Underland bsuecht. Zu mine Pflichte händ no diversi Aläss, wie z.B. Bsuech vo GV's und Gwerbe-Ustellige ghört.

Zum Schluss möchte ich mich bi mine Vorstandskollege, em Tobias Juchler und allne Gwerbler für die kollegiali und kameradschaftlichi Zämearbet bedanke und hoffe, dass ich wieterhin uf ihri aktivi Understützig zähle dök.

Eue Präsident, Jürg Sulser

Otelfingen, 28.04.06